

國粹教科書

文明書局初版

前編

國粹教科書

金匱廉泉編輯

國粹教科書序

廉子惠清取先君寫定尙書及圈識論語孟子益以姚劉曾諸家評隲詩禮左史漢書等哀爲一冊名之曰國粹教科書行焉嗚乎學校之不易興教科之不易定夫人而難之矣滅裂者至欲刮絕古初一切取西人之法以爲快而先王之大經大本前載之典冊高文概置弗顧焉乞鄰之醯而毀家之寶其得失可不必辨或欲進莘莘學子相與表章夫絕學時日既不暇給而其心又非所樂爲強聒而不舍亦安在其爲益也廉子是編雖不敢遽稱典要其亦策時之上佼也夫大清光緒三十二年夏六月桐城吳闈生敬記于濟南節署珠泉

國粹教科書序

學術所以御世變者也故子長作史記自黃帝迄太初凡百三十篇其自述意指曰究天人之際通古今之變今

天子眷念時艱

詔廢科舉設學堂學士大夫稍稍潛討中外之故知六經三史外有所謂四夷之學而一變其嚮者區畛自隘之故習蓋世變之來非一日矣方其未來雖達識之君子知之而不能豫謀及風會既開羣意氣之所趨必有數典忘祖其弊且甚於嚮之區畛自隘者竊不自量甄緝平時經史讀本附以姚劉曾吳諸家圈識繕寫成冊名曰國粹教科書俾上質約指而愈明中材孱守而可跂不致馳騖無涯之域以奪其究天人通古今之日力庶幾所謂御世變者嗚呼拘學不識時務徒斷斷於中西新故之辯或託經術以自文其竄敗而益騰其喙焉則非甄緝者所敢知矣光緒三十二年秋七月金匱廉泉識於上海小萬柳堂

國粹教科書總目

前編

論語第一

桐城吳先生圈點本

孟子第二

桐城吳先生圈點本

尚書第三

桐城吳先生寫定本并圈點

審定句讀與通行本異

詩經第四

曾文正公選本廉泉錄劉海峯先生圈點

禮記第五

廉泉選本并錄姚姬傳先生圈點

左傳第六

曾文正公選本并評點

後編

史記第七

廉泉選本并錄曾文正公評點

漢書第八

廉泉選本并錄曾文正公評點

右八書皆選錄白文以圈點爲主姚先生謂圈點啟發人意有逾解說

吳先生亦謂開示始學莫過於此承學之士苟取此編熟讀而精思之
是猶起姚劉曾吳諸氏相諾唯於一堂其於文之精微思過半矣

論語讀本目錄

國粹教科書一

學而第一

爲政第二

八佾第三

里仁第四

公冶長第五

雍也第六

述而第七

泰伯第八

子罕第九

鄉黨第十

先進第十一

顏淵第十二

子路第十三

憲問第十四

衛靈公第十五

季氏第十六

陽貨第十七

微子第十八

子張第十九

堯曰第二十

論語讀本

國粹教科書一

學而第一

凡十
六章

子曰。學而時習之。不亦說乎。有朋自遠方來。不亦樂乎。人不知而不愠。不亦君子乎。○有子曰。其爲人也孝弟。而好犯上者鮮矣。不好犯上而好作亂者。未之有也。君子務本。本立而道生。孝弟也者。其爲仁之本與。○子曰。巧言令色。鮮矣仁。○曾子曰。吾日三省吾身。爲人謀而不忠乎。與朋友交而不信乎。傳不習乎。○子曰。道千乘之國。敬事而信。節用而愛人。使民以時。○子曰。弟子入則孝。出則弟。謹而信。汎愛衆而親仁。行有餘力。則以學文。○子夏曰。賢賢易色。事父母能竭其力。事君能致其身。與朋友交言而有信。雖曰未學。吾必謂之學矣。○子曰。君子不重則不威。學則不固。主忠信。無友不如己者。過則勿憚改。○曾子曰。慎終追遠。民德歸厚矣。○子禽問於子貢曰。夫子至於是邦也。必聞其政。求之與。抑與之與。子貢曰。夫子溫良恭儉讓以得之。夫子之求之也。其諸異乎人之

求之與。○子曰。父在觀其志。父沒觀其行。三年無改於父之道。可謂孝矣。○有子曰。禮之用。和爲貴。先王之道。斯爲美。小大由之。有所不行。知和而和。不以禮節之。亦不可行也。○有子曰。信近於義。言可復也。恭近於禮。遠恥辱也。因不失其親。亦可宗也。○子曰。君子食無求飽。居無求安。敏於事而慎於言。就有道而正焉。可謂好學也已。○子貢曰。貧而無諂。富而無驕。何如。子曰。可也。未若貧而樂。富而好禮者也。子貢曰。詩云。如切如磋。如琢如磨。其斯之謂與。子曰。賜也。始可與言詩已矣。告諸往而知來者。○子曰。不患人之不已知。患不知人也。

爲政第二

凡二十
四章

子曰。爲政以德。譬如北辰。居其所而衆星共之。○子曰。詩三百。一言以蔽之。曰思無邪。○子曰。道之以政。齊之以刑。民免而無恥。道之以德。齊之以禮。有恥且格。○子曰。吾十有五而志於學。三十而立。四十而不惑。五十而知天命。六十而耳順。七十而從心所欲。不踰矩。○孟懿子問孝。子曰。無違。樊遲御。子告之曰。孟

孫問孝於我。我對曰：無違。樊遲曰：何謂也？子曰：生事之以禮，死葬之以禮，祭之以禮。○孟武伯問孝。子曰：父母唯其疾之憂。○子游問孝。子曰：今之孝者，是謂能養。至於犬馬，皆能有養。不敬，何以別乎？○子夏問孝。子曰：色難。有事，弟子服其勞，有酒食，先生饌，曾是以爲孝乎？○子曰：吾與回言終日，不違如愚。退而省其私，亦足以發。回也不愚。○子曰：視其所以，觀其所由，察其所安，人焉廋哉？人焉廋哉？○子曰：溫故而知新，可以爲師矣。○子曰：君子不器。○子貢問君子。子曰：先行其言而後從之。○子曰：君子周而不比，小人比而不周。○子曰：學而不思則罔，思而不學則殆。○子曰：攻乎異端，斯害也已。○子曰：由，誨女知之乎？知之爲知之，不知爲不知，是知也。○子張學干祿。子曰：多聞闕疑，慎言其餘，則寡尤；多見闕殆，慎行其餘，則寡悔。言寡尤，行寡悔，祿在其中矣。○哀公問曰：何爲則民服？孔子對曰：舉直錯諸枉，則民服；舉枉錯諸直，則民不服。○季康子問使民敬、忠以勸，如之何？子曰：臨之以莊，則敬；孝慈，則忠；舉善而教，不能則勸。○或

謂孔子曰。子奚不爲政。子曰。書云孝乎。惟孝友于兄弟。施於有政。是亦爲政。奚其爲爲政。○子曰。人而無信。不知其可也。大車無輓。小車無軌。其何以行之哉。○子張問十世可知也。子曰。殷因於夏禮。所損益可知也。周因於殷禮。所損益可知也。其或繼周者。雖百世可知也。○子曰。非其鬼而祭之。諂也。見義不爲。無勇也。

八佾第三

凡二十章

孔子謂季氏。八佾舞於庭。是可忍也。孰不可忍也。○三家者以雍徹。子曰。相維辟公。天子穆穆。奚取於三家之堂。○子曰。人而不仁。如禮何。人而不仁。如樂何。○林放問禮之本。子曰。大哉問。禮與其奢也。寧儉。喪與其易也。寧戚。○子曰。夷狄之有君。不如諸夏之亡也。○季氏旅於泰山。子謂冉有曰。女弗能救與。對曰。不能。子曰。嗚呼。曾謂泰山不如林放乎。○子曰。君子無所爭。必也射乎。揖讓而升。下而飲。其爭也君子。○子夏問曰。巧笑倩兮。美目盼兮。素以爲絢兮。何謂也。

子曰。繪事後素。曰。禮後乎。子曰。起予者商也。始可與言詩已矣。○子曰。夏禮吾能言之。杞不足徵也。殷禮吾能言之。宋不足徵也。文獻不足故也。足則吾能徵之矣。○子曰。禘自既灌而往者。吾不欲觀之矣。○或問禘之說。子曰。不知也。知其說者之於天下也。其如示諸斯乎。指其掌。○祭如在。祭神如神在。子曰。吾不與祭如不祭。○王孫賈問曰。與其媚於奧。寧媚於竈。何謂也。子曰。不然。獲罪於天。無所禱也。○子曰。周監於二代。郁郁乎文哉。吾從周。○子入大廟。每事問。或曰。孰謂鄰人之子知禮乎。入大廟。每事問。子聞之曰。是禮也。○子曰。射不主皮。爲力不同科。古之道也。○子貢欲去告朔之餼羊。子曰。賜也。爾愛其羊。我愛其禮。○子曰。事君盡禮。人以爲諂也。○定公問君使臣。臣事君如之何。孔子對曰。君使臣以禮。臣事君以忠。○子曰。關雎樂而不淫。哀而不傷。○哀公問社於宰我。宰我对曰。夏后氏以松。殷人以柏。周人以栗。曰。使民戰栗。子聞之曰。成事不說。遂事不諫。既往不咎。○子曰。管仲之器小哉。或曰。管仲儉乎。曰。管氏有三歸。

官事不攝焉得儉。然則管仲知禮乎。曰。邦君樹塞門。管氏亦樹塞門。邦君爲兩君之好。有反玷。管氏亦有反玷。管氏而知禮。孰不知禮。○子語魯大師樂曰。樂其可知也。始作翕如也。從之純如也。皦如也。繹如也。以成。○儀封人請見。曰。君子之至於斯也。吾未嘗不得見也。從者見之。出曰。二三子何患於喪乎。天下之無道也久矣。天將以夫子爲木鐸。○子謂韶盡美矣。又盡善也。謂武盡美矣。未盡善也。○子曰。居上不寬。爲禮不敬。臨喪不哀。吾何以觀之哉。

里仁第四 凡二十
六章

子曰。里仁爲美。擇不處仁。焉得知。○子曰。不仁者不可以久。處約不可以長。處樂仁者安仁。知者利仁。○子曰。惟仁者能好人。能惡人。○子曰。苟志於仁矣。無惡也。○子曰。富與貴。是人之所以欲也。不以其道得之。不處也。貧與賤。是人之所以惡也。不以其道得之。不去也。君子去仁。惡乎成名。君子無終食之間違仁。造次必於是。顛沛必於是。○子曰。我未見好仁者。惡不仁者。好仁者無以尚之。惡不

仁者其爲仁矣。不使不仁者加乎其身。有能一日用其力於仁矣乎。我未見力不足者。蓋有之矣。我未之見也。○子曰。人之過也。各於其黨。觀過斯知仁矣。○子曰。朝聞道。夕死可矣。○子曰。士志於道。而恥惡衣惡食者。未足與議也。○子曰。君子之於天下也。無適也。無莫也。義之與比。○子曰。君子懷德。小人懷土。君子懷刑。小人懷惠。○子曰。放於利而行。多怨。○子曰。能以禮讓爲國乎。何有。不能以禮讓爲國。如禮何。○子曰。不患無位。患所以立。不患莫己知。求爲可知也。○子曰。參乎。吾道一以貫之。曾子曰。唯。子出。門人問曰。何謂也。曾子曰。夫子之道。忠恕而已矣。○子曰。君子喻於義。小人喻於利。○子曰。見賢思齊焉。見不賢而內自省也。○子曰。事父母幾諫。見志不從。又敬不違。勞而不怨。○子曰。父母在不遠遊。遊必有方。○子曰。三年無改於父之道。可謂孝矣。○子曰。父母之年。不可不知也。一則以喜。一則以懼。○子曰。古者言之不出。恥躬之不逮也。○子曰。以約失之者鮮矣。○子曰。君子欲訥於言而敏於行。○子曰。德不孤。必有鄰。

○子游曰事君數斯辱矣朋友數斯疏矣

公治長第五

凡二十
七章

子謂公治長可妻也。雖在縲紲之中。非其罪也。以其子妻之。子謂南容。邦有道不廢。邦無道免於刑戮。以其兄之子妻之。○子謂子賤。君子哉。若人。魯無君子者。斯焉取斯。○子貢問曰。賜也何如。子曰。女器也。曰。何器也。曰。瑚璉也。○或曰。雍也仁而不佞。子曰。焉用佞。禦人以口給。屢憎於人。不知其仁。焉用佞。○子使漆雕開仕。對曰。吾斯之未能信。子說。○子曰。道不行。乘桴浮於海。從我者其由與。子路聞之喜。子曰。由也。好勇過我。無所取材。○孟武伯問子路仁乎。子曰。不知也。又問子曰。由也。千乘之國。可使治其賦也。不知其仁也。求也何如。子曰。求也。千室之邑。百乘之家。可使爲之宰也。不知其仁也。赤也何如。子曰。赤也。束帶立於朝。可使與賓客言也。不知其仁也。○子謂子貢曰。女與回也孰愈。對曰。賜也何敢望回。回也聞一以知十。賜也聞一以知二。子曰。弗如也。吾與女弗如也。